

समे — 12:25

<><><><><>

एह आकाशवाणी जम्मू ऐ, हुन तुस जगमोहन शर्मा कोला खबरां सुनो।

PM Raisina

प्रधानमंत्री नरेन्द्र मोदी होर अज्ज नमीं दिल्ली च रायसिना ङायलाग दे 18में संस्करण दा उद्घाटन करगन। न्यूजीलैंड दे प्रधानमंत्री क्रिस्टोफर लक्सन उद्घाटनी सत्र च मुख परौहने दे तौर पर शामिल होंगन ते मुख भाषण देंगन। इस बरे कार्यक्रम दा विषय सार ऐ “कालचक्र लोक, शांति ते धरती कार्यक्रम दरान दुनिया भरै दे नीति निर्माता ते विचारक बक्ख-बक्ख विषयें पर गल्लबात ते बचार बमर्श करगन। अज्जै गै प्रधानमंत्री नरेन्द्र मोदी हुंदा न्यूजीलैंड दे अपने जोड़ीदार कन्नै गल्लबात करने दा बी कार्यक्रम ऐ। जिस दरान भारत ते न्यूजीलैंड दे सरबंघें गी होर बेहतर बनाने दे बक्ख-बक्ख पैहलुएं पर सोच बचार कीता जाग। हुनै कोला किश चिर पैहले दवै नेता दिल्ली दे हैदराबाद हाउस च मलाटी लेई पुज्जे न।

<><><><><>

PM-Pak

प्रधानमंत्री नरेन्द्र मोदी होरें आखेआ जे पाकिस्तान कन्नै शांति कायम करने दी भारत नै जेहड़े बी कोशश कीती, ओहदे परते च दुश्मनी ते घोखा गै हासल होआ ऐ। लैक्स फ्रिडमैन हुंदे कन्नै पॉडकास्ट इंटरव्यू च मोदी होरें मेद जाहर कीती जे ईश्वर पाकिस्तान दे नेताएं गी सद्बुद्धि दे तां जे दपक्खी रिश्ते बेहतर होई सकन। उनें आखेआ जे ओह मन्नदे न पाकिस्तान दे लोक बी शांति चांहदे न ते ओह बी इस उथल पुथल ते अशांति थमां तंग आई गेदे न। उनें आखेआ जे 2014 च उनें अपने शपथ ग्रहण समारोह च पाकिस्तान दे उस बेल्ले दे प्रधानमंत्री नवाज शरीफ होरें गी चेचे तौरा पर साददा इस मेद कन्नै दित्ता हा जे दौनै मुल्खें बश्कार दोस्ती दा नमां ध्याह शुरू होग पर ऐसा किश बी नेइ होआ।

<><><><><>

J&K Encounter

कश्मीर घाटी दे कुपवाड़ा जिले च आतंकवादिएं ते सुरक्षाबलें बश्कार अज्ज इक टाकरा शुरू होआ जेहड़ा अजें बी जारी ऐ। पुलसै दे इक प्रवक्ता नै आकाशवाणी समाचार गी जानकारी दित्ती ऐ जे जिले दे क्रमहूरी जचलदारा इलाके च आतंकवादिएं दी मजूदगी बारे इक टकोहदी सूह थोने पर पुलस ते सुरक्षाबलें दी सांझी टीम नै इलाके गी घेरने पर उत्थें छप्पे दे आतंकवादिएं सुरक्षाबलें पर गोलीबारी शुरू कीती जेहदे पर टाकरा भखी गेआ। ब्योरे गी बलगेआ जा'रदा ऐ।

<><><><><>

Sy CM Kupwara

तोआई उपमुख्यमंत्री सुरिन्दर चौधरी होरें कुपवाड़ा च चलै करदे टाकरे दी निंदेया करदे होई आखेआ जे इस चाल्ली दियां घटना जम्मू कश्मीर सनें भारत गी कमजोर करने दी साजशें दा हिस्सा ऐ। अज्ज मीडिया गी संबोधत करदे होई उनें आखेआ जे आपसी सद्भाव ते भाई चारा गै साढ़ी सब्बने शा बड़्डी ताकत ऐ ते मुखे खलाफ इस चाल्ली दिएं साजशें गी कदें कामयाब नेई होन दित्ता जाग।

<><><><><>

DOPT

प्रधानमंत्री हुंदे दफतरे च राज्य मंत्री डॉ. जितेन्द्र सिंह होरें आखेआ ऐ जे हुन कोई बी तलाकशुदा जां घरै आले कोला बक्ख रवा करदी धीह अपने सुर्गवासी पिता दी पेशन पर अपना दावा करी सकदी ऐ ते हुन उसी इस अधिकार लेई कनूनी लड़ाई नेई लड़नी पौग। इक समाचार अजेंसी गी दित्ते गेदे इक चेचे इंटरव्यू च डॉ. सिंह होरें आखेआ मजूदा समाज दिएं चुनौतिएं ते वास्तविकताएं गी ध्यानै च रखदे होई सरकार केई बड़्डे फैसेले लै करदी ऐ, जिंदे नै महिलाएं गी उंदे अधिकार जकीनी तौरा पर हासल होन ते उंदा सशक्तिकरण जकीनी बनी सकै। उनें आखेआ जे तलाक दी प्रक्रिया जेकर पिता दे जींदा होंदे शुरू होई दी होवै तां धीह अदालत दे मुकदे फैसेले गी बलगे बगैर पैहले गै अपना दावा पिता दी पेशन पर करी सकदी ऐ।

<><><><><>

Surya Ghar Camp

स्वच्छ ऊर्जा गी अपनाने बक्खी लोकें गी जागरूक ते आकर्षित करने दे मकसद कन्नै जम्मू बिजली बंड निगम लिमिटेड औं दी 18 मार्च गी जम्मू दे बाहू प्लाजा दे सेंट्रल पार्क च इक विशेष कैंप दा सरिस्ता करने जा'रदा ऐ। इस पैहल दा मकसद लोकें गी सौर ऊर्जा दे फायदे बारे दस्सना ते कन्नै प्रधानमंत्री सूर्य घर मुफ्त बिजली योजना थमां किश चाल्ली लाह हासल कीता जाई सकदा ऐ, इस बारे जानकारी देना ऐ। इस मौके माहिरें आस्सेआ लोकें गी इस स्कीम तैहत् होने आले कम्में, एह्दे लेई दरखास्त देने, घरें दी छत्तें पर सोलर पैनल लाने बगैरा दी पूरी प्रक्रिया दी जानकारी देंगन, जेह्दे नै बिजली दी बचत होग, लोकें दे पैहे दी बी बचत होग ते साढ़े संसाधनं ते पर्यावरण दा बी संरक्षण होग। इस स्कीम कन्नै लोकें गी बी फायदा होआ'रदा ऐ ते उंदे पैहे दी बचत बी।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह् 120मीं किशत होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एह्दे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह् कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एह्दे कन्नो कन्नी एह्दा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एह्दा डोगरी च अनुवाद प्रसारत कीता जाग। एह्दा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>